



Ioseph fait serrer les bleds aux greniers du Roy: Iacob enuoye ses enfans en Egypte acheter du bled.

OSEPH ayant fait deuoir d'amasser des bleds , qui abondamment auoient crû és pais d'Egypte , les fit aussi serrer és villes : Sçauoir est , ce qui croissoit à l'entour de chacune d'icelles. Et fut le froment en si grande quantité , qu'il s'égaloit au sablon de la mer , en sorte qu'on cessa de le nombrer. Mais les sept années finies , aduint que la famine fut si grande , que le peuple cria vers Pharaon pour auoir du pain , lequel les renuoya à Ioseph. Luy ayant fait ouuir les greniers Royaux , vendoit le bled au profit du Roy , & estoient les deniers mis en son thresor , & par ce moyen durant cette famine Ioseph acquit au Roy tout le bien des Egyptiens , & le cinquième de tous les fruits qui croissent au pais. De toutes Prouinces on venoit pour auoir du bled en Egypte (la famine estant en la terre de Chanaan) Iacob y enuoya ses dix enfans pour acheter du bled , retenant seulement avec luy le petit Benjamin ; lesquels estans arriuez s'enclinerent deuant le Gouverneur , luy requerant d'auoir du bled pour subuenir à leur necessité. Ioseph les connoissant estre ses freres , n'en fit aucun semblant : ains parlant à eux fort rudement les fit mettre en prison , leur imposant qu'ils estoient venus pour espier les places fortes du pais.